

Harga Hartanah Di Selangor Melonjak Kerana Dijadikan Pelaburan - Khalid Ibrahim Bernama
7 Februari, 2013

SHAH ALAM, 7 Feb (Bernama) -- Menteri Besar Selangor Tan Sri Abdul Khalid Ibrahim berkata harga hartanah di negeri ini melonjak naik kerana permintaan tinggi daripada pembeli yang menjadikannya sebagai pelaburan.

Beliau juga menganggarkan harga rumah di Selangor akan terus meningkat pada masa akan datang disebabkan kewujudan pelabur hartanah itu.

Sehubungan itu kerajaan Selangor sedang mengkaji kaedah pembinaan rumah pasang siap mampu milik bagi membantu penduduk membeli rumah, katanya pada sidang media selepas merasmikan Bengkel Maklum Balas Isu-isu Dasar Pengurusan Tanah Negeri Selangor 2008-2012, di sini Khamis.

Menurutnya kerajaan negeri sedang meneliti kaedah pasang siap yang dilaksana di United Kingdom dan Australia bagi menyediakan rumah mampu milik pada harga RM150,000 seunit.

Mengulas perkara berkaitan, Abdul Khalid berkata kerajaan Selangor berjaya mengutip RM800 juta daripada hasil berkaitan tanah tahun lepas berbanding sekitar RM400 juta pada tahun-tahun sebelum ini.

Kutipan meningkat kerana penggunaan dan nilai tanah semakin meningkat di Selangor, katanya.

-- BERNAMA

Copyright © 2013 BERNAMA

Source: <http://www.bernama.com/bernama/v6/bm/newsindex.php?id=926857>